

ربيع المسرح

# العرس

النص الأصلي  
محمد إدريس

البحث الدراماتيورجي  
مجموعة المسرح الجديد

سنتمار

يدير السلسلة : توفيق الجبالي

صدر في نفس السلسلة :

- تمثيل كلام

- جحا والشرق الحائر/

البرني والعطراء

© جميع حقوق الطبع محفوظة لـ « سنمار » 1985 .

18 مكرر ، نهج ابن خلدون - تونس

الهاتف : 346.811

## إلى الذاكرة الجماعية

زمانها ، « المسرح الجديد » كان اسمو « المسرح الحر » .  
وقتها ، في الربيع 1976 ، كان صعيب عقل أهل المسرح يقبل فكرة  
مسرح حر - معناها - خاص . اخترنا اسم ثاني باش نفتتحوبيه  
مهرجان الحمامات في صيف 1976 : « مسرح العموم » .  
أشهرة من بعد ، الأستاذ محمود المسعدي اعطانا اسم ثالث على  
ساس اللي نعملو في الجديد ، أمالا مسرحنا هو « المسرح الجديد » .  
وقتها ، المسرح المحترف الخاص خذا تسكرة ولادتو الرسمية ...  
ووقتها ، ناقد مسموع شدّ صحيح في كل مقال يكتبو اللي « المسرح  
الجديد » - الخاص - هذا ، تجاري .

في ليلة من ليالي مارس الطويل عام 1976 ، تقدمت مسرحية « العرس »  
في صالة يحيى للفنون ، في اخراج للفاضل الجعايبي والفاضل الجزيري ،  
والتنسيق الفني والضوء للحبيب المسروقي ، وتصميم الفضاء الركحي  
للفاضل الجزيري ، والشريط الصوتي لتوفيق الجبالي ، والتمثيل لجليلة  
بكار ومحمد ادريس والفاضل الجزيري .

الفكرة متاع « العرس » جات من رواية « برتولد بريخت » العرس  
عند البرجوازيين الصغار . أما « العرس » الجديد يبدأ وقت اللي

« عرس » بريخت يوفى ، وجمعة من بعد ... هذا علاش حقو تسمى  
« السابع » .

لأول مرة في تونس رواية تتقدم في علاقة جديدة ومقصودة مع  
الجمهور ، في صالة ما تكساب شيء من التياترو كان قريبها للمسرح  
البلدي ، في صالة الناس يلقاؤ ارواحهم مقابلين بعضهم ، العين في  
العين ، والرواية بيناتهم كيف لعبة الشطرنج ، كل قطعة تتحرك على  
سبب ، إيلا ما ظهر وقتها ، بيان بعد شوية والآخر .

الناس تنفرج ، النفس متاعهم قريب لنفس الممثل والمثلة .

الناس تنفرج : قدامهم كبة تتخبل وتتسرّح بالمكشوف .

فرجة في وقتها ما خذاتش حقها . قليل اللي فطن بـ « العرس » وقليل  
اللي تمتع بيها .

ثمّة حارة ، هاذوكة هوما اللي نلقاؤهم في كل مناسبة ، يلوّجو على فرجة  
تبدّلهم غليلهم وتخرّجهم من المألوف ومن سكة « الهائي الهائي » و « حق  
سيدي حق » .

في الحفلات الثلاثة الأولى كانت الصالة مرصعة بالأهل والأحياب  
والمعجبين والمغرومين وقيادة الأحوال والقطاعة والشمائيتية ، ومن بعد  
وصلنا نلعبو قدام أربعة أحيار وبتلنا عرض - في صالة يحيى - على خاطر  
لمينا حارتين فرايجية .

تقدمت « العرس » بخلاف صالة يحيى للفنون - وتهديات لبريخت - في  
دار الشباب في المرسي ، الراس يضرب في السقف .

تقدمت في كنيسة قرطاج في « طقس » ما يتناساس : تقول للبير بويقول  
لك بويين ،

تقدمت في دار المسرح وما ننساؤش ليلة تكتبت فيها كلمة  
« الحق » ....

وتقدمت في خزنة دار ، بدون تعليق ... وتقدمت في قاراج خارب في  
حمام الأنف ، وفوق برامل قدام ثلاثة آلاف عسكري في جرجيس - كيف  
اللي يحكي في همولراجل أمو - وتقدمت في جربة في السوق - كانت كيف  
النشافة وقلة الماء بعيدة ، وما تقدمتش في طاطاوين على خاطر اخواننا  
المهاجرين ... تقدمت في الحمامات : أبيض في الأبيض مع ريحة الياسمين  
وتكبّ سعدها في طبرقة في مهرجان الخفاف ودخلت للقبر في المسرح  
البلدي ، على شير من التيرقان الحديد فوق الحفرة متاع الموزيكجية .  
رواية « العرس » رواية تتحب .

في وقتها ، ما تحبتش كيما تستحق وما تسمعتش كلمتها ، ها الكلمة  
الي تخرّج القاع ، من فم كل تونسي في لغة حية ، هازة العيشة من القابلة  
للغاسل ، ومدزوزة كيف ، لا يمثل ، البهيم الي هازز حمل الناس  
ومذموم .

تقدمت المسرحية في صيغة غير هذي المطبوعة ، أما الروح هي هي ،  
والحرف هو هو ، اما مضغوط ، والوضعيات مقولبة ، قياس الممثلين  
والإيقاع المسرحي والإلهام .

ثمانية سنين من بعد ،

تونس الى حد الآن قرية في عالم الفن ،

حلطنا وخدمنا ، وما زلنا نخدمو ونخدمو ، كل واحد في جيهتو ، باش  
التوانسة يراؤ ارواحهم وغيرهم يراهم . يفهمو ارواحهم وغيرهم يحب  
يفهمهم ، خارج البونيقين والرّومان وبني هلال والترمان والصّبنيول  
والترك والفرنسيس ... و .

الوقت ما زال قصير للتقييم على خاطر الحاصل مفرق ، منسي والا  
مجهول .

المسرح التونسي في حاجة للذاكرة ، ذاكرتو وذاكرة الناس ليه . وكيف  
ما قال نيتشه : « المستقبل في يد الشعوب اللي باش تكسب احسن  
ذاكرة » . مستقبل المسرح التونسي مرهون بذاكرة ناسو ، نقول أنا .  
الى ذاكرة اصحابي الثلاثة وروح الرابع الي سافر بذاكرتو وبرزق  
عينيه ، الي خسرو الفن في تونس وفقدناه .

محمد إدريس

باريس ، نوفمبر 1984

# العرس

عرضت مسرحية « العرس » في صيغة نصية مضغوطة منتقاة وضعها  
المؤلف بالتداخل مع عملية الاعداد الركحي ، في حركة التفكير الابداعي  
الجماعي داخل مجموعة « المسرح الحر » : الحبيب المسروقي - جليلة  
بكار - الفاضل الجعايبي - الفاضل الجزيري - محمد ادريس .

## الشخصيات

هي وهو عروسة وعروس في سابعهم .  
هو ، فاتح ، عمرو 32 سنة يخدم متوظف في قبضة .  
منظم ، دينٌ وجدي ويحترم الخدمة والمُرتبات الإدارية ومستكفي  
بروحو .

عندو صاحب ، الوحيد الي عاطيه الجنب .  
هالصاحب يخدم حجام ، هو الديبر متاعوكيف بجير وهو حافظ  
اسرارو ، وهو البانكة متاعو وقت الشدة .  
بيه هو تشجع باش جدد العلي الي فوق داربوه وكسمو باش عرس فيه  
بيه هو استعان باش يواجه مصاريف العرس والثالث وحفلة السابع .  
فاتح في الجبيرة من رقبتهو لحزامو على خاطر تفصعتلو فقرة من كرومتو  
نهار الثالث .

هي سارة عمرها 25 سنة أمها مربية .  
قرات ثلاثة سنين في مكتب متاع صنايع بعد الشهادة .  
خدمة مرة Placeuse في سينما ما تعدي كان الافلام المصرية وتأثرت  
بالميلودراما والنجوم المصرية اللامعة .

ومن بعد قرات في مكتب فرمليات وولات ممرضة مساعدة في قسم  
التصوير . حتى نهار تعرقت على فاتح وهامت بيه ، سلمت في الخدمة  
وعجلت بالعرس باش تخرج من ذمة بوها وعيلتها الي ماقتتها وحارمتها .  
سارة تحب الزهو مغرومة بروحها وتحلم بعيشة في الخير تنسيها  
ماضيها .

## الفضاء الركي

بيت قعاد مستطولة في وسط الناس ... ما ثماش حيوط .  
ثريا كبيرة تضوي على طاولة مركبة من زوز ظروف ماكينة خياطة عليها  
لحاف أبيض مزرعة بسرابس وفاضل متاع ماکلة دايرين بيها ثمانية  
كراسي لا واحد يشبه للآخر وكري حجام بجنبو فيوزة كبيرة وسخان  
بالقاز وراديو كبير أنتيكة فوقو ماكينة أسطوانات تدور في ديسكو مكسر .  
في شيرة من الشيرات عرصه متاع صنادق كرضونة أنواع الي متاع  
سرابس والي متاع حوايج ....

الحال خريف .  
والشتاء تصب .  
الوقت نصف الليل .

## دام الفرح

هي وهو يظهر على العتبة .  
هو مَرزَقْنُ بالبرد حَاطِطُ كَبُوطِ فَوْقِ رَاسِهِ وَهَازِزُ سَاقِ عَيْرِيَّةِ .  
هي لَابِسَةُ كَبُوطِ مَشْمَعِ فَوْقِ تَبْدِيلَةِ فِي يَدَيْهَا سَحَابَةٌ - الْاِثْنَيْنِ  
مَبْلُولِينَ .....

هي زَاهِيَةٌ وَهُوَ مَكْشَبِرٌ .  
يَظْهَرُ مِنْ دَخَلْتِهِمُ الْيَّ كَانُوا يَشْتَعُونَ فِي ضَيْفَانِهِمُ الْاِخْرَيْنِ الْيَّ سَهَرُوا  
مَعَاهُمْ بَعْدَ عَشَاءِ السَّابِعِ .

## البنية المسرحية

مركبة من سبعة أبواب :

- 1 - دام الفرح .
- 2 - الوجه والقفاء .
- 3 - الحق والواجب .
- 4 - الدبارة .
- 5 - الداء والدواء .
- 6 - كلام الليل .
- 7 - كيف الناس الكل .

## الوقت المسرحي

واحد مسترسل مع الحركة .

## الضيفان :

القايض ، سي اسماعيل ، عَرَفَ « فاتح » مرتو « مارتين » بلجيكية ،  
« مصطفى » الحجام ، صاحب « فاتح » أخت « فاتح » وخطيبها  
« الأجودان » بو « سارة » .

أم « فاتح » كانت حاضرة هي الي تَلْهَاتُ بيهم .  
هو وهي ياقفو مشوار في العتْبة .

هي تلعب عينها على الذَاير ، شايشة .

## هي - مرّالش حد آخر نشيعوه ؟

هو يدور عينيه ، الحوسة اللي في البيت عكّرتلو مزاجو .  
هي تشيع السحابة وتلوح كبطوها المبلول وتدور بالطاولة : هاي تذوق من  
هالفاضل ، هاي تذوق من الآخر ... من صحن لصحن لفنجان لفنجان .

## هي - شيء ما خلّو .

هو يتبعها بعينه موش عاجبو الحال ، يمشي لجهة الراديو باش يسكّت  
الديسكو المكسر اللي شادد نغمة ما سيّب .

يطبّس بالشوية على خاطر رقبته توجع فيه ، يحط الساق بجنبو ويمد يدو  
للديسكو باش ينحيه .

هي تجي عينها عالساق العيرية ، تقعد باهتة شنية ومنين جات ومتاع  
اشكون .

هو يفيق بالساق يخزر لمرتو ويتَهَرّ ويتنفض ويخرج بيها لبرة ، هي تخلط  
عليه وتقف في العتبة تضحك بالشهقة .

هو يرجع يلهث يبعدها من العتبة ويدخل بالساق العيرية في يدو .

## هي - ساقها والآ ساقو ؟

## هو - .....

هي ترى كلسيطة تتدلدل .

هي - كلسيطتها !

تبهت وتبعث تكتكيتته جوّيده .

## هي - اللّطف ... اللّطف .

تتصكك بالضحك حتى تشرق وتولي تفغم ، تجري للطاولة باش تشرب  
فاضل الدبابز والكيسان .

هو يخزرلها بعين الشامت ويتلهي يشوف ثماش بقعة تليق بالساق يحطها  
فيها في الأمان ويلوّج يلقاش لحاف والا تزيّباله نظيفة يلفها فيها  
ما يلقاش .

## هو - ما بقى شيء نظيف في هالذار .

هي تلقى قطرات «كوكا» ترجع فيها الرّوح .

## هي - يكبّ سعدها باش نموت في جرتها .

ودوب ما تشوف الساق اللي راجلها حاير في لفانها ، تتطرشق بالضحك ،  
هو يشيرلها بصبعو للقاعة .

## هو - بالشوية ... راقدين .

هي تقيش ، يتعدى ترينو يزعزع الدنيا .

## هو - السّابع وفي ... وقت نوم .

هي - نضحك حتى في اللّيل .

تقهقه وتمشي لجهة الساق يتعرّضلها .



هو - يهديك .

هي - على خاطر ساق مرآة عرفك ؟

هو يهزّ السّاق .

هي - أش عماء ياخذ مرا عايبه ؟...

هو يهزّ السّاق كاتم غشو . ما يجاوبهاش . هي تواصل .

هي - والّا على خاطرها قاوريه ؟

هو - .....

هي - يهلكهم كيف يطيحو برجالنا يسلبولهم عقلهم . ما يعرفو  
كان ياخذوهم .... شبابهم يدفنو هولهم ومكتوبهم  
يفرغو هولهم .

هو يشير لها بالسّكات .

هي - هذا الكلو عشق ؟

تهبط عليه قطرة ماء يثبت فيها يجاوبها برياض .

هو - يحبّها وتحبّو .

يجيب لينا يحطّو تحت القطرة اللي شغلتلو بالو .

هي - كذب . يكفرو من العرب .

هو - « مارتين » تحبّ العرب .

يحطّ زنكة الماء فوق السّخان ، يحطّ فيها عظمتين .

هو - والّا ما تجيناش بالمتعني وتهديلنا « سيشوار » .

ياخذ « السيشوار » ويبدا يشيحّ في شعرو .

هي - هاها ... جاتنا باش تعدّي وقيت ... باش تسكّر  
وتتمنيك .

هو - جات تهني ومع زوجها اللي هو عرني .. والشّراب عندهم  
في بلجيكا موش عيب .

يتفقّد الماء . هي تنقّز على الكرسي اللي كانت قاعده عليه « مارتين » في  
السّهريّة .

هي - هاي كيفاش كانت قاعدة . أنا ما يفوتني شيء . راجلها  
لهنا وخطوفه صاحبك لهنا . السّهريّة وطولها وعينيها في  
اشكون ؟

يفطن بقطرة أخرى من السّقف يقعد يلوج على ماعون .

هي - « في صطوفه » .

هو - .....

هي - وعقلها في اشكون ؟

يحط الماعون تحت القطرة الثانية ويقعد يعسّ بالسّرقة .

هي - « في صطوفه »

الحلوف ... أش يعرف يشلوش .

هو - هذا تقطيع .

هي - انا اللي نراه نقولو ... هاذي طاولة تشهد عليّ قدام ربّي  
كان نكذب .

تشدها نوبة متاع ضحك .

هي - كيف نتفكّر اللي يد صطوفة جات على هالفخذ ، وكان عرف  
اللي هو لوج ، من ورّاني راهو عيط عيطة القضاء

هو يضحك ، بعد يفتن بروحو . يقصّ الضحك ويخزر للسقف اذا كان  
تماش قطرة أخرى .

هي - ما صاب قامتلو وقت اللي حبّ يشطّحها .

هو - طلعت حُرّة .

هي - لا لا .. خافت لا تشطح على ساق بركة ... ياخي المغبونة  
رُوحتْ ساق سابقة وساق لاحقة .

هو - الكلو من « مصطفى » .

هي - مأهو الأ صاحبك وانت اللي رصفت معاه الدبابز تحت  
الطاولة .

تهزّ اللحاف ، تكشف على صنادق متكمه بالبيرة .

هي - شوف المعمل ... انت وياه ، حطيتهم من العشية  
بالسرقة من أمك وانت تثبّت ... قتلك أخطانا على خاطر بابا لو

كان يشمّ ريحة الشراب يطيح روح .

هو - كان حبيت ... سوكارجي تايب .

هي - سترني ربّي ما فطنشي بالخصوصي كيف تكسرت الدبوزة  
عند ساقين « صطوفة » .

والمكبوبة في عوض تعمل روحها ما راتش ، بدات تكتكت  
وطبست تحت الطاولة ، تمكّن بيها راجلها .

هي تضحك وتواصل .

هي - وانت ... يامن شاف وجهك وقتها ؟

هو - عجبك أفعال سي « مصطفى » .

هي - لو كان موش هو راهي السهرية تعذات ماسطة باردة ...  
وانت مع سي عرفك تقولش عليك في القباضة .

هي تقلد .

هي - هكّه هكّه ... مشاشو .. بالسيف سي « مصطفى » يصول  
فيها ويجول .

هو يجبد العظمتين من الماء ويحط الزنكة عند ساقيه ، ينحّي صباطو  
ويشمّر ساقين سروالو ويبدأ يحط ساقيه في الماء ويتوحّج .

هو - بانّا حقّ الراجل يصول ويجول في محلي ؟

جبتو باش ينورّي وجهي يصبح يسكّرلي ويتمكّنلي بمرأة  
عربي ... يغزّ بيها ويسكرها ... وانت اسمعني مليح ...

عربي ضيف وانا مانيش مشاشو .

أنا مضيّف والمضيّف يلزمو يتلهي بضيفو على أحسن  
الكيفيات . أش عملتو « مارتين » باش يهدمها عش السعادة  
الزوجية متاعها ؟

أش بيها .. ماهيش مخلوقة ؟ .....

وهذا سي مصطفى اشكون أدنو يردّي داري « كافي شانطة » .

يمدّ يدو للعظمة الأولى ويبدأ يقشّر فيها .

هو - وانت حطّ في بالك اللي أنا مجالسي ونعرف نعطي للناس  
قدرهم ونحاورهم باللي يفهمونه ويطعمونه بالأخص اذا كان

عندهم اللّمع والتلف في المعاني بحكم رتبتهم ... تراه  
الملح ... أش تعمل بالـ Hiérarchie ؟ والـ Supérieur

Hiérarchique ؟

جاتنا Circulaire في الحكاية D'ailleurs ... بلا لعب .

مانيش مشاشو انا مضياف انا عربي ويلعن بو المصلحة  
الشخصية قدام الواجب .

يوفى من مأكلة العظْمَة الاولى يمدّ يدو للتّانية ويبدأ في تقشيرها .

هو - والشّهامة فين تحطّها ؟ وسي « مصطفى » حَمَمِي وجهي ،  
قضى عليّ إلا ما نحطّلو خشمو في النّجاسة .

هي - برّبي لو كان ترَجَعَلو فليساتو قبل ؟

هو - شنوّه ؟ باربعة صوردي يحبّ يشريني ؟

هي - اربعة صوردي ؟.. نصف مليون بخلاف الكرسي .

هو - بخلاف هذا ، حتى شيء .

هي - العليّ هو اللي بناهُولِك . الموبيلية هذي هو اللي  
جابهالك ، الكرسي هذا متاعو ، نَحَاه من حانوتو ليك انت ..

باش يحلالك النوم بعد اللّاطخة اللي كليتها وتلوي عنكوشك في  
الثالث .. سيادتك الفرش ما يساعداكش .. حكم الطبيب .

نزيدك ؟

و السّابع ؟... حقّ تقدّسلو ليه هو موش لعرفك .

يكمّل من مأكلة العظمة الثانية بالغصّة . يمسح فمّو بالشويّة . هي تترمي  
علي فوتاي وتحط السّاق عالسّاق وتتكيف . ساعة ساعة تشير لوباش  
ينقّص من الحسّ . هو يتكلم بجديّة .

هو - إنّما تُعرّفُ الأخوان عند الشدائد .. هذا ما قالي عقلي .  
قبلت فلوسو تصرّف فيّ كيف الحاجة المشرية .

السّلف رُدو إحسان . كل يوم يتعدّي يَمْرِكِيّة ... ديما ...  
زايد ... كل شبر في داري عندو فيه حقّ .

اللي خذات يديه الفلوس من عند ثعبان ، فاش قام عليه يتربع  
من قلة الامان ؟ يستاهل لسعاتو ، يستاهل لفّاتو . ما عليه كان

يكفّي رُوحو بُرُوحو و لُو بالجوع .

السّلف رحمة من اللي عندو أصل والسّلف نعمة من اللي ما  
عندوش أصل .

يكلم ساّرة .

هو - غدوة نرجعلو قشّو ونرجعلو فلوسو على آخر فرنك .

أنا هالصحبة من اليوم دفتنها ، انا حرّ .. نقلتها هالنفس كان  
باش تلزني للاهانة ، أنا هالخشم نقصّو ... هات المقصّ برّبي .

تجيلو المقصّ ويبدأ يقصّ في ظوافر ساقيه . تتفرّج فيه وتشيرلو باش  
ينقّص من الحسّ .

هو - وانت منين ليك تشطح معاه ؟

حريم نهار سابعا تشطح مع سكران ...

هي - انت حبيبت .

تبدأ تخمّل في الحوايج بنطّرة .

هو - بنات الأصول ما يشطحوش قدام ابّاتهُم ورجالهم  
والبرّانية . ما يشطحوش مع سوكارجي يضرب أمو ويعمل  
الموبقات ...! مرّتين تشدّ على سُكر واضح مع رُبْلَة وعربدة  
وتسكّع في الطّريق العام .

تشطّح معاه قدام عرّفي ؟ تحطّمي ناموسي وصورة استقامتي  
ومستقبلي ... وتجي تقلّقي مرّتين «مارتين» موش مرة ولا

مرّتين ... في جيبي De La Bilgique شوميزات يا مدام .

هي - قللتها اهديلي ؟ بحياة راس فلوسي .

هو - أوّلا ، موش فلوسك . ثانيا : الدينار ما ينصّرّفش في  
الخارج ..! ما تعرفش اللي هذا ترافيك متاع عملة صعبة ؟

ونازلتها موش ساهلة ...! وفي الأخر تقطعها سُيُورَ  
وتعايرها ... قَدْرُكَ من قَدْرُهَا ؟ أش مجيبك ليها ؟  
زايد ولد البلاد يظهر عليه والمربّيّة تظهر مربّيّه ، وكبّ  
الطنجرة ...

هو يركز ساقيه على الزنكة ويمشي بيها .

## الوجه والفاء

هي تصيح وتنوح وتكتّ ، هو يشعل الراديو ويفركس على موجّه ... يلقى  
الغناء .

هي - نستاها نستاها .. غلطني . ما أحلاها في .  
أنا اللي قبلت نربط حياتي بيك يا خاين يا غدار ... خسارتي  
كبيرة وليعتي أكبر !  
أش ريت ما راو أندادي ؟ اشكوني العروسة اللي في عرسها  
موبيليتها ما هياش حاضرة ؟

هي تنوّح هو يقوّي الرّاديو ( غنايه ) . يظن بقطرة جديدة في السّقف .  
يقمّرها ويعرضلها مغرفة .

هي - أش كوني العروسة الّتي يهينها راجلها ويصدّرّها في صالة  
سقفها «باش» يقطر ؟

هي تنوّح .

هو - أنا موش خاين ... أنا تلاقات عليّ ظروف وعلى قدّ الكساء  
أمدّ رجلي . الموبيلية كانت حاضرة .... حكاية ميتين دينار .  
نطبعهم ؟

... كيف أنا ربي خلقتني نكره السلف ما نحبش نُغرق في الديون  
ونتمرد في عرضي .

كرامتي لا تُشترى بالخشب ولو كان مضروب بالبوليمينتو .  
أنا سنوّه ذنبي ... كيف الناس الكلّ تحبّ تعرس فرد تاريخ  
وفرد صالة ؟ .. وأش كان عليه سقفها باش ... صالة معتبره أمّا  
الطقس فسّدها .

هي - هنيّنتني على ليسته متاع فنّانين معروفين ... يصبح يدور  
بيّ صنّاع متاع كافيشانطات .

هي تنوّح هو يظن بقطرة جديدة في السّقف ، يمشي يجيب « بانو »  
ويحطو تحتها .

هي - قصفنتني في يوم فرحتي ... جايبلي سّخّارة «دزيرية»  
عزوزة تحرّن . في عوض المضحك . دبارة سي صاحبك باش  
بدعتلي بحالي ... أرانب وحمام ماركس كان فوق راسي ...  
ضحكت علي الخلق وشمّت فيّ حسّادي .

هو - أنا ... ذنبي اشنوّه اذا كان الجوقات فيهم القُطعية ؟

خذاولي العزبُون وهربو عليّ و D'ailleurs النجوم الّتي حببتهم  
أرتيستوات متاع وتلّه يلعبو عربي وسوري ما عندك ما تقول !  
ثمّه شطّاحه وحدة كانت متاع كافي شانطة . أش كان عليه ؟  
ياخي أش عندك ضدّ التراث الشعبي ؟  
والسّحارة ... فكرة خارقة للعادة بدليل عجبت بوك ...  
والسّاعة ما هياش عزوزة وخدمت عشرين سنة في سيرك عمّار  
الدولي .

هي تعدّد هو يقوي في الراديو .

هي - الراجل يحب يسيطر عليّ ويحطني تحت ركبة أمو

هو يتكلم في نفس الوقت . كلامو مقطّع .

هو - فاش قام التسيطر والحق يقال ولو على نفسك .. أمي مرأة  
ولية .

هي - أمو ؟ أمو عملت في فاميلتي وخرّجتهم من الصالة  
بدموعهم .

هو - ما ندخلش في حكايات النساء

يبدل الموجة متاع الراديو .

هي - وانا الّتي لقاني كيف تلوى عنكوشو في الثالث قعدت  
بجنبو كيف الأم الحنّانة ، في الاستعجالي ، في بيت التصويره  
لبيت الجبيره حتى طلع علي الصّباح .

هو - التبعيّة نرفضها كيف البلدان الغير المنحازة الّتي رفضت  
الانحياز والاستسلام تحت ركبة الدول القويّة . شفت  
«مصطفى» أش عملتو ؟

غدوة ياخذ فلوسو اللئيم ... اللي يعبت بالصداقة اللي وصى  
عليها سيدنا ابراهيم الصديق ....

وانت مالك الا مرتي . اشكون تحبو يداويني ويواسيني ؟  
البرانية ؟

اليوم انا ، وهدوه انت ولوكان تعجك كرهبة والا تغرق والا  
تتكلم عليك دبوزة قازو الا تمشي طرف ما ايلك طرف ... ما كانش  
خليني عازب خير .

هي - اللطف علي . لليوم وانا واقفة على ساقني في خدمتك تحت  
رحمتك ... عروسة جديدة في سابعي نمس الخيشة قدام  
الضيغان ، قدام عرفك اللي تحب تصون حرمك قدامو ، قدام  
العايبه مرتو . يا منافق ، يا مداهن .. العيب ديما مني انا يا  
صاحب الاصل يا كذاب . الدار للطياح وتخبي علي ، الا ما  
نخطف كلمة طايشة من فم صاحبك ، هذا علاش وليت تكرهو ،  
على خاطر فضحك يا غدار ، تغزبي تحطني في دار للطياح ،  
خربة سقفا كيف الكسكاس .

هو يتكلم بجدية .

هو - بالشوية . الضيم ما نحموش بالأخص كيف يجيء من  
مراة .

النفسانية متاع الرجل كيف تتلمس في اعماقها ثور والثورة  
باراج قايم ما يوقفوش سبانك والهاهما متاعك .

انا مشيت الرجال اللي بشلاغمهم وبكيتهم ... موش أنتي .. هيا  
ترة بلا لعب ، الدار ما هياش للطياح .

هي - أنت خاين وعندي بزاييف .

نهارت الاستعجالي طحت بالمائدة متاعك . فيها 55 دينار وميتين

وفلسة . أنت اللي في الفاتحة قتلي تصور 80 دينار بخلاف  
المنح . كيف شفت 55 دينار بلعت السكينة وقلت سعادتنا ما  
تتقاسش بوسخ الدنيا ... ياخي ظهر داموسك غارق ! وتفيش  
علي بالك Hiérarchie والشهامة وانت جرد حجام ينجم يهبطك  
لوسي يعزيني في دثبي !

وعد الله علي انا الضحية اللي خيرتك على غيرك رجال بكراهبهم  
بديارهم . وحدهم ، اماتهم ميتين ... فريجيدارتهم جد ...  
بالتاليفونات والصلوات .

هي تنسج

هو - اشكون قالك شهرتي 55 دينار ؟ ...

والسوايع الزايدة وال Prime وال Rappel ؟ ومنح الانتاج  
وال Heures Supplémentaires نسيتهم يا مهبولة ؟ ... وانا لواء  
استادنتو ؟

هي - « مصطفي » ؟

هو - عرني « اسماعيل » ..... يجذ عليك الدار في الطياح ؟ ... انا  
دريوش نحت فلوسي باش يقولولي اللي هي للهدان وبارك الله  
فيك وفي الاصلاحات الهامة اللي ادخلتها في العلي .

هي تحط ديسكو فيه لحن يحرك المشاعر وتسرح كاينها نجمة في فيلم  
مصري ، هو يتكلم معاها فين تسكت ويسرح بالشوية حتى لين يوتي يتكلم  
معاها فرد وقت .

هي - ويني الايام اللي باش تزهاي من دهليز الحرمان مانيش  
خارجة انا أسيره وصغري ضاع ودخلت لجحيم ما فيهبش

أجنحة الرحمة . قدّاش جريت بين الورود انا البريئة من  
الخطيئة ...

خُبِّثْتَنِي الورود ودَمِّي مع دمعي سال ...

قدّاش كليت من طريحة على خاطر قلت جُعت .

قدّاش تعديت من قسم لقسم في أعظم مكتب وبدني ذاب في  
الامتحانات ...

هو - يرّي من الكفر اسمع كلام راجلك لا توّي كافره ويصحّ  
رجمك بججّارة من سجّيل . خَلّيني نقضي اموري وانت وخيتي  
اتلهي بعشّ سعادتك وأش يلزم راجلك ويكمل شعورو  
بالسعادة بعد الشغل متاعو في الواجبات والاعمال الشاقة .

هي - ويا ما نقزت ثلاثة أقسام فرد عام ... يا ما تعدّاو قدّامي  
أولاد من جيلي وانا مالاھيه كان بدروسي والـ Calcul متاعي  
وبكتب المطالعة وبجرجي زيدان وعبد المطلب الأبراشي وعبد  
المطلب عبد القدوس وبطرس البستاني والمصوّر وعبد  
الحليم .

لامشييت لسينيماوات ، ولا شطحت في Sirprise بارتيات حتى  
Aniversére ما حضرت فيه ... وأش خصّ ؟ .....

هو - ولو فرضنا الدار للهدان .. اشنوه ؟ أطمعو من فمو ...  
ما ثماش حاكم وتنظيمات في البلاد ؟ .. ولو فرضنا الدار  
للهدان .. اشكون قالك اللي هي اليوم والا غدوه ؟

.....  
ما نحكيش معاك في هذا الموضوع .

ياختي لو كان جيتك صاحب محنة ؟ ... كيف سي «مصطفى»  
ونضرب «أمي» .

احمد ربّي عندك راجل مثالي يخاف ربّي ويعرف القانون .

هو يمشي يجبد قجر بالاوراق . القجر ما يحبش يتحلّ .

يكلّمو بعضهم في نفس الوقت من غير ما واحد يسمع في الآخر .

هي - أنا دخلت للحياة

بعفافي ... شفت الدنيا

ألوان ألوان في حُكّة ظلمة

وانا Placeuse شفت

الخيالات تذوب وحواليّ

الظلام والوحشة والعفاف

متاعي في غابه ترهز

بالوحوش .. خيّرت نعيش

في الواقع ونخدم المجتمع

متاعي ، ونشارك في حملات

جمع الدّم . واقع الآلام

والفواجع وبين الجروح

وبين الرّوح المعذّبة

الأسيرة في المستوصفات

والمستشفيات

والسببيلات متاع شارل

نيكول . ساعدت اللي

ماشين بالآلام والخوف من

الموت والحرمان

والعذاب . مشيت بخطوة

هو - أش بيني ؟ كيف

الناس وخير عنهم ديما

القدام ، شوف الاعداد

15، 16، 16 ونصف ، 17 ،

شوف حسن السيرة ...

معروف بالنجابة واللّمع في

المعاني وحسن الاستقرار

على كل قرار ! هاو طابع

البوليسية .

ما ناذي حدّ ، خالص مع

الحاكم ومع الناس ومع

ربّي شدّ ، شوف تلقاشي

توخير في دفعان تواصل

الضوء والماء والزبله

والخروبة وبونوات بنك

الدّم والعصا البيضاء

والكشافة والياناصيب .

شوف معنى الضمير

ونكران الذات وياما خدمت

تريكووات لضحايا البيافرا

هي - ثابتة للدنيا الأخرى  
وشربت السم الفتاك اللي  
باش يرتحني ...

ليه العذاب !

حلّيت عيني في الليل  
نستخايل روعي في عالم  
الارواح واذا بيها بيت بلّار

هو - وما نفلت حتى خميس  
«سيدي بلحسن» .

وبرّه يا اختي الدّار  
للطيّاح ؟ وانا شنوّه ذنبي  
كيف قالولي عرّس بالعجّلة  
راهم حاجتهم بالدّار ..  
خبّيت التنبيه الاول ،  
خبّيت التنبيه الثاني قلت  
ثماشي ما ينساوني .

ياخي الثالث جابو اللّوسي  
ومعاه بوليس ...  
مجبور .. يحبو يعملوها  
Parking للكراهب اللي كُثرو  
في البلاد .

مانيش أناني على خاطر ما  
عنديش كرهية غدوة توي  
عندي وما نلقاش فين  
نحطها .. ترضاني ندفع  
خبز أولادي للفوريار ...؟  
لا يا اختي المصلحة العامة  
فيها المصلحة الخاصة

يحتّو Parking في  
بلاصطها خير من اللي تبرّك  
علينا وعلى الخلق ونخسر

هو - مالي .. مالي اللي في ها  
الاوراق .. فاتورات من اللي  
دخّلت نمّامة العرس  
لراسي وانا أدفع خلّص :

السقف ، الزليز ، الليقة ،  
والدّار ما هياش عاطية  
الطّوع .. ولو الليقة تجيب  
التبييض الدهينة وحوسة  
الدهينة باش تزبان وتحلي  
في عينك .

والعش اللي حضّر كايّنو  
ليك ، انت من اليوم اللي  
ريتك في ليلة من ليالي  
انصيف المقمّرة وانا بين  
يقظة ومنام . وقف علي  
«سيدنا ابراهيم» الخليل ،  
كيف ما عندي توه .  
فقطّانو أخضر ولحيتو  
مخضبه بالحنه وسكّينتو  
الشريفة في يدو ... باشني  
من جبيني اليمين وقال لي :

يا بُنيّ انت «فاتح بن فلان  
الفلاي» ؟

قلت : أجل . قال :

هي - شفتو ... عينيه في  
عيني تسأل فيّ بجنيّة .

شرقت الشمس بابتسامتو  
وفتّحت لي جنيّة الأحلام  
اللي كلّها ورود عبّرة .

جرينا الاثنين اليد في اليد  
كالأطفال اللي يعرفو  
بعضهم وتلاقينا في جنينتنا  
اللي عّاساسها ناس ملاح  
يدخلنا حتى لبيتو  
ويعطينا نشربو وقت  
الأصيل والدنيا غبره كيف  
الموبّر كنت لابسه بالغبّرة  
وهو عنود سورية عبّرة  
نموت عليها ، مرتين هرّيت  
غسلتها في الدّار بكلّ حنان  
نبوس ونعنّق فيها ونقول  
اسم الله على الموبّر ...

لين الفجر لاح كيف شعاع  
الشمس يدخل لبيتي



هي- ونشغل الراديو على  
« صباح الخير » . بيتي  
دهنتها غيره باش نتفكرو  
قذاه قطفنا من ورود حتى  
ردينا الاحلام والوعود  
حقيقة ودخلنا عش  
السعادة الزوجية وسط  
الورود والرياحين  
والالحان والعذاب متاع  
الفنانين والزغاريد . كنت  
وردة فتحت في الثالث على  
معاني الحياة الزوجية  
والرفق والحنية وفي  
السابع غنيت بالفرح يا  
حبوا ! وسط الأحباب  
حسيت بالسعادة بقربو .

هي تسرح في غنايه .

هو- « اسماعيل » ولدي سمع  
كلامي ياخي جازاه ربّي  
بكبش ... وانت تسمعشي  
كلامي ؟ نحبّ نصحّي  
عليك وشيء مقدر .

الحقيقة جاتني الغصّة  
وفكرت في العشّ اللي بنيتو  
وكسّمتمو لشكون ؟

هو عليه السلام شرق  
النور من وجهو دخل لقلبي  
جات قدامي تصويرة  
« سيدنا اسماعيل » عينيه  
مسكرة وملاك نازل بكبش  
هدية لبوه ... الحقّ عيني  
زغللت وقلت : أنا اللحم  
وانت السكين يا نبّي  
اللّه ....

وهزّ السكينة وصوّر بيها  
دورة في الهواء ونزل على  
رقبتي وتقول السكينة  
ولآت حرير .. فولارة زرعي !  
أنا هكّه وحسّ بنادر وتذكير  
وتشقت السماء تقولش عليّ  
في فيلم وظهر ملاك شباب

هو- لابس بالأخضر وبجنبو  
حورية مسلهبة في لحاف  
أخضر وجهها مغطي .  
« سيدنا ابراهيم » قالي : انت  
طابع اعطيني رقبتك للفداء  
والتضحية من غير تردّد ،  
الموّل جازاك ! وتقدّم  
بأسني ولبّسني جيّو  
الخضراء بالشمس وشاز  
للملايكة تقدّمت الحورية ،  
خذا بيدها وبيدي ... وانا  
باهت في عجب ربّي وأمرني  
باش تنحّيلها الخامة  
الخضراء ، خزرتلو ياخي  
قالي : افعل يا بني سميت  
بسم اللّه ونحيت الخامة :  
شرقت الدنيا .. قمر في ليلة  
النص .

وظهر وجهها هي هي :  
ضحكتلها ضحكثلي  
وضحك « سيدنا ابراهيم »  
زادت شرقت الأنوار وقالي :  
هيّ ليك دنيا وأخرة في  
الحلال المحلّل وتشقت

هو- الأرض واختفى «سيدنا

ابراهيم» والملاك في رمشة عين .

وقعدنا في الروضة السندسية مع العصافر

تسبح للواحد القهار وتقول :«فاتح» فتخ عليه

ربّي ، صبريا خي نال بنعمة المنان ... في صغرو

خانتو سخانة في المصارن على متابعة دروسو حتى

للباكالوريا . كان يحب يولي ضابط في المدفعية وقد

تربى على النظام والانتظام والاستقامة والشهامة

والشرف .. تلز المسكين على نجابتو يقص القرابه

وينخرط في المالميه .

فأعجب رؤساؤه بفطنته وحده نكائه والجديا

متاعو وقدره أيمًا تقدير وهو في تقدم وما ينقصه إلا

نصف دينه فجازاه ربو على قد قلبو ، دوب ماكمل العلو

توفى من الغناء ، تهبط عليها قطرة من السقف ، تتبدل

سينتها وتحط ديسكو فيه لحن متاع رياح وزوابع .

هي- أوراقي ذبلت وتقلعت بدمها .

رياح الخطر تعصف بي ...

هي- أنا في حطر اجريوي هو- اللي أذخل عليه تحويرات

منعوني . في بالي هربت من القطرة لقيت روعي في

خربة اتعس من القاراج اللي تربيت فيه ، فيه راجل

اختر من بابا ذوقني الامرار ، لا رحمه ولا شفقه

حبي علي اللي الدار للطياح باش زرب العرس

وحصلني . وعد الله علي باش نتقرب

ونتلوح في سقيفة سيدي محرز ... اللي يتعدى

يقول : هذيكه عروسه جديدة راجلها غر بيها

وخانها ولوحتها في الشارع في سابعا .

هي تنوح ، هويسكت ويخزرها بكل حنان .. سكات .

يضحك ويقهقه ، تفكّر حاجه .

هو - ملأ سيرك .. رقبتي وجعنتني من قوّة الضحك .

يضحك .

هو - الأجودان هَبْلُو سي «مصطفى» الحرايمي ! ياخي حَلَلْنَا  
قَارَزْنَةَ .

يقلد .

هو - رَتْلًا تَرَأْفُ ... واحد ، اثنين ، انبطح  
وتَبْطُخْ علي طولو ... مسح القاعة بكِسْوَتُو ..  
وأش مدخّلوا هُو يحكي على التياترو أش يعرف منّو  
هي - وتحبّو تعطيوه أختك هالمصعصع .

هو - أما خير والا تقعد في راسي .

ياخي نسينا ارواحنا ؟ هات نقلهاو بمشاكلنا .

هو يحط يدّو على كتافها ويبوسها من جبينها .

هو - شوويه جديّات من فضلك .

ماكش في ضايح ياختي ..

غدوة ساقى ساقك عندي لشكون نتوجّهو ....

أمور الهدان موش تحتو اما عندو نَظَرُ عليها من بعيد وعندو  
التلطف والتعقل وينجم يتداخل بكل حماس وما يردناش  
خايبين ... يلزمنا بَرَكَة نعرفو كيفاش نكلّموه .

هي - في هذا ما تعملش عليّ ... عرفك سهريه وطولها كلّمتمو

ثلاثة مرّات بالحساب .

هو - عر في قابض ما هوش مسؤول .

## الحق والواجب

هو لأهي بيها هي ، حزينه ومسلّمه أمرها .

هو - اشكون قال اتجمو نعرسو بالسّهولة الكلّ ...

إش يا دجاج !

من غدوه تبدأ سعادتنا الزوجية ! ... هيا امسحلي هالدميعات

شيء ما صار أنا وياك الاثنين ، كالبنيان المرصوص .

يدور بيها .

هو - وحدك ! كنت فايژه عليهم !... للآتهم

المسؤول ... هو مسؤول .

يلوّج في كلامو .

هو - المسؤول .. متكلّماني ومجالسي اذا تكلم سحرّ واذا وعد  
نجز

أما عرّفي لا يوعد ولا ينجز ... مسكين قابض على روجو !  
شفقتو ؟ .. اللّهُ ومثو جاني وقعد حتى الآخر ونجّمت تكلمو انت  
ثلاثة كلمات .

الرّاجل حدّ في القباضة ما ينجّم يكلمو أكثر منّي بخلاف  
عالمسّلامة بالسّلامة ، اللّهُ يبارك ، أدخل ، سكرّ الباب وهات  
الحساب ... ما يقول شيء ...

ثلاثة كلمات عندهم معاني ومعاني ...

ثلاثة كلمات تردّع الجبال وتحثّن قلوب الرجال .  
هي - يرّيني منك ، تنفخ في ؟

هو - نعرف تراب بلادي . هيا تره سمعني الجواب العزيز اللّي  
تخاطبو بيه في موضوع عشّ السّعادة الرّوجية .  
هي - نحشم

هو - احسبو كيف بوك

تكتكت .

هي - بابا ؟

هو - فكّر يا اختي معنة الكلام ... بوك .

هي - اللّهُ يتولّاه ! مرّرّ لنا العشاء بحكاية خالو والدّماله اللّي  
رُزّرت في خشمو وما حبّت تنفّع كان في يد الغاسل .

هو - ما تفكّر نيش في المكذرات .

هي - انت الرّاجل ، انت اللّي تتكلم مع المسؤول .

هو - انا نتكلم في القوانين وانت بالأحاسيس .

انت وتزّ وانا وتزّ !

انا وتر المعرفة بالتراتب واللّعب بالحيثيات وانت وتر

الدغديغ في الاحاسيس والمعاني ...

تفضل يا اختي : ابدأ .

هي تحضّر روحها تتمشّي تترشّق وتنطق .

هي - يا اللّي ما تخيّب قاصدك : عشّ السّعادة الزوجية ما  
تهذمولناش البلدية .

هو - لا لا يا اختي . من الباب للطّاق تدخل بيه للموضوع ؟ ...

ويني سيادتك ربّي يهنيك ، وسكته وخزرة حنان لي انا ،

وتذيله متاع عينين . علاش لا ؟ ... نورّيولو اللّي احنا

متفاهمين ....

هذا الوتر الحساس اللّي باش نبني عليه التكتيك ... وسعادتنا

الاثنين تويّ سعادتو هو .

هي - هذي المرّه الاخره باش نكلّمو : العشّ متاعنا حطينا

أملنا ومألنا كيف باش يتهدّ نضيّعو مفتاح السّعادة ...

تتلخبط في الكلام هو يتكلم لروحو .

هو - وحلّة ... وكان يقوللنا : الشّي تقرّر .

هي - القرار يمجّيه قرار آخر .

هو - لا عاد ! ... ظاهر فيك ما تفهم شيء من التنظيمات !

القرار كيف الوليد اللّي يتخلق يحبّلو تسعة شهر باش يتكوّن

وشوف قدّاش يحبّلو باش يتولد ويويّ عبد .

.....  
هكّاة القرار والآراهي الناس الكل لا وعد ولا ميثاق ولا تستقر  
على حال .

هي - انا وفيت ... اخدم انت علي وتّر القانون .  
هو - كيف المسالة فيها مصلحة عامّة نتّساعّدو معاه ونضربو  
تأجيل طويل النفس حتى نلقاو وين نبنيو عشّ سعادتنا  
الجديد .

هي تخزرولو كاينها تقلّو زيد على قدام .

هو - لا يجعلني عراضة قدام حدّ !  
ضميري يوبخني ويرجع عليّ أصلي .  
نخلي الناس تخدم على ارواحها... واحنا راس ورويس بقدره  
ربّي ما نحيروش !

.....  
لواه التبّعكيك في الواجبات الواضحه ؟

كيف الدّار باش تويّ Parking أشّ تحبهم يعملو ؟  
يبطلو على خاطر عندنا جرد خربة متداعية للسقوط ؟

هي ما تجاوبوش ، سكات طويل .

هي - اهديهالهم .

هو - ما تقطعش الأمل يا اختي .

## الدّبارة

هي - غدوة تخلق شاري .

هو - ما عندي ما نبيع .

هي - أشّ عندي فيك .

هو - غدوة ان شاء الله يصبح نهير طيب . نمشيو الاثنين

ساقى ساقك

هي - غدوه ترتحنى من هالخربة .

هو - يهديك الدّار متاع بابا .

هي - تهزّ بوك للعدل يعملك توكيل ، وتنخيلو العقد وتقلّو باش

نسجلو من جديد في البلدية وتعطيه للشاري وتعطيني  
الفلوس ....

انا ندور على السمساره وناخذ فيلا والا بوظمان لروحي  
استقلال تام .

هو - تفدك .

هي - يظهرلك .

هو - تحب تقضي علي .. تعرف القوانين والعقوبات انت ؟

يدور على روجو .

هو - وكان نهز توكيل وبيع بالزور وبابا يشكي بي ؟

هي - ماك تشخم العدل .

يقول اللي بوك حب يبيع برضاه .

هو - انا هو العدل اللي تنجم تشريه ؟

تسخايل الناس المحلقة بلا ضمير وما يخافوش ربي والحبس .

هي - اش خاسر ؟ لوج . نلقاو اللي يساعدنا .

هو - ما ثمة حد . انا انسان قد قد وشريف . عمري ما نستعمل

الحيلة ونغدر بابا اللي عاقد في النواره .

انا نمن بالتشجع اما نقدر للوالدين ، لا ياللا ... وياساق .

سكات ، يعاود .

هو - ولو فرضنا لقيت العدل وهزيتلو بابا وعملنا التوكيل

ومشينا دعوة متلازمة للبلدية وسجلنا التصحاحه وبغت الدار

ويفطن الشاري اللي الدار للطياح .

هي - حتى يفطن .

هو - يفطن في نهارتها .

تسخايل الدواليب تخدم بالزعواني ؟

انا نبيع منا والسنيال يخدم من غادي . المراكز الكل تسمع

ويتحلو الدوسيات بالتفاصيل والرقايق .

حتى الكلام اللي قلتهولي توة يبدأ مسجل وشاهد آخر وتباصي .

ثمة دواليب وماكينات يطلعوك امراة اشكون ويشدوني انا وانا

بريء منك !

اش عمثلك ؟ تقصلي شبابي ....

نعرف بابا يسامحني ، اما البرانية والإدارات ، لا لا

.....

تحب تضرني ؟ بره أرقد ، برة أرقد .

انا على خاطر غلطة متاع عرقي :

الصفر يكتبو كيف التسعة بالبعبوص ، على نية رب العالمين

غلطت في الجمع ياخي ضربت التليفونات والجهازات :

تقرطست في رمشة عين .

وكان جيت تعرف اشنوه التحقيق والتدقيق .... يوم لا ينفع

مال ولا بنون . اللي يعجبك في القانون لا يفرق لا بين هذا ولا

هذا ، ولهذا ما نفعني حد .. وياساق .

.....

صفر ، زيرو .

وكان ما بانث حقي راني مانيش هوني . خلي حكاية ملايين .

بره اعمل توكيل ها هوكة بابا قدامك . بيع الدار واشري عدل

وفيلا ، انا بريء لأك مرتي ولاني صانعك وفي قابل نقود بيك .

هي - تخوف في ؟

هو - يعيش اختي ترضاشي نخليك هجاله بعدي والا انت

تخلّيني هَجَال ؟ تضيعني طول عمري .  
بانا وجه نقابل النَّاس وانت في إِصْلَاحِيَّةٍ والقرديانه مقرّده  
عليك ... انت تتحرّك وهي ثقَلْكَ : برّه ارقد خيرك !  
ما تعمّلشي عليّ في فازيته .  
هي - انت راجل ويعمّلو عليك النَّاس ؟ يا خوآف يا خزيّتي .  
أش ما جاء يوقفك . ظلك تهرب متو . ما عندك فين توصل .  
هو - يا اختي ....  
هي - ما عادش ثقليّ أختي لا نتصرّع عليك . مانيش أختك .  
.....

ما تعيش كان عيشة الترميد !  
اللي يتعدى يسطكك من اللي تقوم للي ترقد .  
شنيه حياتك تحبّ تردني كيفك نقفّ حتى يرحموني .  
.....

ان شاء الله الخربه تبرك على راسك وعلى داركم .

تسكت سكات طويل .

## الدّاء والدّواء

هو - ربّي يخلق الدّاء والدّواء .  
غدوة نصبح عند «مصطفى» نتصالح معاه .. راهو قلبو طيب  
ماهوش حقودي .. الشّراب قليبُو مُخُو .. موش مستأنس يعمل  
هكّاه ..

هاو توه تشوفو يجيء يطلب منّي السّماح .  
هذاكه سُولا مّجي قمقوم وبرّه يعطي الفلوس ويعاير .. من فمو  
موش من قلبو

أنا نعرفو مليح وعندي فيه ثقة عمياء .

نمشيو نسكنو عندو ... حكاية تدبير راس .

عندو ياسر وسع .

هي - وكان نهار من نهارات وانت ماكش في الدار ويدخل علي  
سكران ؟

هو - احنا نسكرو باب بيتنا بالغانجو و أش يهمننا فيه ؟

هي - أش تقول يا خاين ؟

هو - أش بيك فيسع تبدل راك ؟

هي - تحب تلعبها بي ؟ تخرجنني من القطرة تجيبني تحت

رحمة سي «مصطفى» اللي استعمارو أدهى من استعمار داركم

هو - اسكت راهم يتصنتو فينا .

هي - انا غدوه خارجة لدارنا وايجي هزني كيف تلقى دار تليو

بي . وسع وموقع وبيت بانو واستقلال .....

يجعلو سابع الاعداء والنصارى والقبط وعشيرة من

الشمائيتية .

هو يحضر فرشو

هو - اهدأ ما تعيطش .

هي - نعيط ونعرف الدار تجمعا والدار تفرقنا .

هو - ارقد راهو الليل راحة . غدوة ... نلقى تاويل مع سي

مصطفى .

هي - مازلت تكلمني عليه نقتل روعي . انا مروحة لدار بابا

هو - اهدا .

هي - فاليجتي .

هو - العن الشيطان الناس راقده .

هي - لا فايقين شامتين في .

هو - هلؤاس . ادعي لربي يفرج علينا .

هي - ادعيو انت يفرج عليك باش تنجم تقوم بمرا كيف ما يلزم

هو - يا اختي ....

هي - انا خارجة وما يستحقش تجيني تلحس ! ما نحب نراك

كان بمفتاح ! حر كيف الرجال .

اللي بمعنة الكلام

هو - تنجم تخرج .

هي تبهت

هو - اخرج فاش تستنى ؟

هي - تطرد في ؟ تطردني في عقابات الليالي ؟ تحب تشمت في

حسادي ؟

أش اكثر ما شمتهم في ؟

هو - اخرج علي .

هي - والله ماني متفرقة من هنا الا ما تجيبلي دار .

هي تكسر الفيوزة هو يحاول يضربها .

هي - تهز يدك علي ؟ ما تمسنيش ما تحقرنيش على خاطر ما

عنديش رجال ؟

لو كان جاء صطوفة لهنا راهو كسرك خليقتك .

تهبط عليها قطرة

هي - هاني تبليت ، هاني نكح باش ننبطط .. ان شاء الله

نكح الدم ونموت خلي تراتح مني . ان شاء الله يبرك السقف

علي يدقطني يتخلط لحمي مع عظمي



وفي الجريدة متاع غدوه يقولو هذي مرا عقدت النّواره في  
راجلها ياخي جابها وسكّنها في خربة تحت رُكبة امّو !...  
الاثنين بَزَكُوا عليها السَّقْف ياخي ماتت وماتت معاها أحلام  
شبابها .. سَمِّتَتْ فيها حماتها وحموها وراجلها .  
تنوّح .. يهرب الضوء يقعدو في الظلام .

## كلام اللّيل

الظّلام تقرييع وتطرييق ، هي خايفه وهو خانس ... سكات .

هي - شوف الضوء .

هو - .....

هي تصيح .

هي - الضّوء !

هو - هرب على الحومة الكلّ .

سكات .

هي - الوقيدة .

هو - ما نتكيفشي .

هي - ما تخلينيش في الظلام .

هو - .....

هي - اهبط لداركم جيبي وقيدة .

هو بالشوية .

هو - ما نجيبش

هي - هبطنش .

هو - اهبط انت .

هي - اشكون الزاجل أنا والآنت .

هو - أنا مريض .

سكات .

هي - أش بيك حانيس ؟ أش تعمل ؟ .... ما تخوفنيش .

هو يقربع حوايج بالعاني هي تصيح . سكات . هو يتكلم بالشويه .

هو - أنا من اليوم باش نحل عيني .

.....

ضحكاتها تبسيماتاها ما تعجبشي .

.....

دواها برنامج صارم .

.....

الخرجه مرّة في الفال ساقى ساقها وحتى لمة في محلي .

هي - أش تتمتم ؟

البرق بلعج والرعد يرعد ، هي تصيح وهو يسبح . حسّ التقربيع قوي

هو - الوقيدة .

هي - ما نعرفشي .

هو - انت تنكيف وترميها وين جات جات .

هي تتوسّل .

هي - شوف من شيرتك .

هو يعنّز في صنادق يطحو عليه ، هي تصيح .

هي - السقف . السقف .

هو يتوجّع .

هو - قنبلة ما تطيحوش .

هي - وينك .

هو - بعيد عنك .

هي - باش تقتلني .... نحّي علي الظلام رجعلي الضوء ... اعمل

لي تاويل

قلبي يدق نرعرش بالبرد دفيني خوذني بحنانك .

هو بالشوية .

هو - فرصة باش تعطيني راياها فيه .

.....

هي - ما تعذبنيش .

هو - فين أنت ؟

هي - ما اعرفش .

هو - اشنوه رايك فيه ؟ ...

هي - اشكون ؟

هو - هو .

.....

« مصطفى »

هي تشهق .

هو - أه ؟

هي - انا نحبك أنت .

هو - علاش تضحلكو يا « سارة » .

هي - معزة فيك يا حبيبي .

هو - والشطيح ؟

.....

والشطيح ؟

هي تنوح بالصوت .

هي - عماني ربّي وعزّي إبليس ... ما عادش نعاود صنعتي .  
فصلي ساقى كان مازلت نشطح ... انا شريفة ... بنيّتي ...  
بعفافي .

.....

السعادة خلّاتني نخرج من سيّنتي . انا ما نرى حد غيرك . أنا  
ما نقول بحدّ غيرك .. « فاتح » انا ليك على طول .

هو يهّمهم .

هي - وراس بابا ما نفكر كان في خيالك . صدقني يا حبيبي .  
هو - « مصطفى » .

هي - سوكارجي .  
هو - كيفاش تخليه يوشوشك في وذك .

هي تنوح .

هي - جبهالي .

هو - أش قالك فيها ؟

هي - ما فهمتش .

هو - علاش ما عطيتوش كف .

هي - خفت يعطيني طريحة .

هو - حسبتني مت ؟

.....

ولا يسلم الشرف الرفيع من الأذية حتى يهبط عليه الدم شرتلة .  
هي - خفت عليك . على سمعتنا والشهامة والاستقامة واللمعان  
قدّام « سي اسماعيل » .

عرفك ..... وكان فطن بابا راهو ذبح « مصطفى » من قفاه .

هو - Cayest نقضي عليه يتذكرها مرشومه يوم لا ينفع الندم .  
أول ما نبدا نقوم بحملة ضدّو : نسرخلو البق في الكراسي  
نحطّلو الشلهب في حكة ال-Talc . نجيبلو السيبان والبرغوث  
ونفضحو في الشارع وفي الحمام . نهزّب عليه « الكليانطيه » !  
وينجم وقتها يحرق ديبلومات الحجامّة اللّي مزين بيهم  
الحنوت !

راهو ما خذاهمش .. شراهم .

ثاني باب : كيف ما يلقي حتى كلب يقرقطلو ، نمشي للبوليسية  
ونقوللهم اللّي يترفك في الشراب ! نسيت ما قتلکش ... نهارات  
الجمعة وفي الاعياد .

وكيف ما يصدّقونيش البوليسية نهرهم خطيوة خطيوة في الليل ونعملو هجوم دلّول على حانوتو اللي كل ليلة سبت من نصّ الليل لماضي ثلاثة كيف نخليهم مازالو ساهرين ، مجلس شراب وسكر وعربدة في حومة فيها أربعة زويّ وجامع كريم وكتاب وحمّام وناس تخدم على ارواحها .. خاطيها الشرب . ويدخلو البوليسية من الشباك والشقاق ومن الباب ويكرفطوه هو والعصابه متاعو ..

.. بفضلني أنا وناخذ جائزة من مقاومة الاجرام ويويّ «مصطفى» فار حبس وتبكي عليه أمّو حتى لين تعمى وتموت بالحسرة والأسى ويفهم وقتها ان عاقبة السكر وخيمه . ضيعتلو مستقبلو وصاحبو الوفي ، اللي هو انا وأمّو اللي خاطيها وربّي سبحانه في الوجود والقانون لا ينام .

هي تنتهد .

هي - ذوّبتلي قلبي اعطيني ساقك نبوسها انت مولى بيتي وعمارة راسي ....

ما احلى خبزتك .... السهرية الكل وانا غارقة فيها كلّها حنان حتى على اللي ما يستحقّوش .... ما يستحقّوش .... حرام فيهم الخيرات ....

انت عبد ؟

ويضروك العباد ؟

.....

عرفك ومكبوبة السعد متاعو تكلفو لنا عشرين دينار بين حلو ومالح سوري .

.....

شوف يَرْجَعْشِي عليه أصلو ويتكلّم عليك باش تترقى فيسع .  
وتاخذ قباضة صغيرة وحدك وفيها دويرة صغيرة بالضوء  
والماء Salle De Bain والتليفون و Chauffage Central .  
هو - هو ما يقضيليش !

دوسي يقضيلي ولو بعد عشرين سنة .... ويجي وقتها يشوفني في قباضتي النموذجية كيفاش نمشي الناس قدّ قدّ كيف الحسابات . التنفيسة لا . الصّف والامتثال والسكات والخدمة تقدّح .

.....

عرفني ماضي ما تقولش موش ماضي أمّا شويه رغوّاني . يخرزلو جيت محرّخر وإلا راهو اللي جاي بمائدّه يويّ عيرود ويعمل نظام على رّي راسو على أربعة صوردي .

.....

هي - الدقّازه قالتلي يوم عرفتك اللي سعديك لقدام ، والفلوس اللي يتعدّاو على يديك بلا حساب .

.....

أنا معاك على كيد الحساد ... كلاونا ماكله هرّسوننا ... يحبّو يفرقوا ما بيناتنا ويشمتو فينا .

سكات

هو يلقي وقيدة يشعلها ، يجبد شمعة ، يشعلها ، هي تزغرت ، هو يجيب شمعة ثانية وثالثة ورابعة وخامسة ويجبد قجر الطاولة ويفرز اوراق ، يختار منهم ورقة حمّرة .

هي - .....

سكات

هو - اهبط للدّار اللّوطي را هم فاقو .

سكات طويل هو يتكلم بالشّوية وعمّال يقوي صوتو .

هو - بالحجره ايدي تهزّات ! لحمي ودمي في كل فُرْضَاوي ! في كل صانتي متاع ليقه ! عزّقي ، فلوسي ، شبّابي ، فلوس الناس ، مستقبلي ، سعادتني ، ثقة الناس في .

هي - فينهم وعودك ؟ فينهم مشاريعك ؟ اللي عبّيتلي بيهم راسي ؟ حسابات ، دفاتر فيني ؟

هو - ....

هي - تبهير ، تفشفيش . ما تموت كان جَرْد عُون في القباضة . الناس تكسب وانت تحسب !

تخرج من هالخربة تموت ، انت متاع كراء ؟ ... باش بالخمسة وخمسين دينار والميتين وفلسة ؟ ... كانش تسرق ... لا لا ماكش راجل .. انت خوّاف ....

يا خوّاف .

هو - .....

سكات .

هي - الناس تبني سعادتهم من حتّى شيء !

من الشطّيح ، من الكورس متاع الزوايل ، من البونيه ، من

الشراب .

يتكلم بالشّوية .

## كيف الناس الكلّ

يطلع الصّباح عليهم الاتنين ، هي في شيرة وهو في شيره . فراشيه على اكتافها وهو مقعّمز على شافة قجر الطاولة المفروّت . أوراق وتواصل في يدو وتنبيه أحمر متاع اللّوسي . سكات هو يتمتم ، هي تتقرنص خانسه تتلفتلو . هو يورّيه الورقة ويؤكد براسو .

هو - اليوم .

هي - .....

هو - أي نعم .

هو - الشَّراب ما يُتَمَرَّشِي واحنا ماناش متاع هذا ؟  
هي - من الحمامة .

هو - اخطانا من الحمامة . حك راسك وِّي حَجَام ...  
«مصطفى» .....

كل قاراج يوِّي حانوت حَجَامَة . قَطَّعُوا الخبز على بعضهم .  
هي - الروبافيكيا .

هو - خذاوها

هي - اللبلابي

هو - كيف كيف

هي - الصَّحلب

هو - كيف كيف

هي - الحلو

الكسكروت بالعظم

الكسكروت بالدجاج

هو من الأول يسرح ، يتمم ، من بعد يوِّي يتحاور معاها بالجهار .

هو - الدجاج

الدجاج ايه الدجاج !

دجاجة تكفي - دجاجة بياضة نكركوها عشرين يوم وتفقس !

راس المال .... فلاس يولييو عتاتق وفرارج ... دجيجات ،

دجيجات هكّه الفخذ .

.....

تعرف وين ؟ في مخزن أمي .. نخرج منو الفخام ونعملولو

مَضُوءَة في السقف متاعو ونجيزوّه ونحطلو «الديديتي» ، يقتل

الميكروبات والبُغْبُش

الدجاج امسخ ويلزمو ياسر نظافة .

النظافة تثمر الخيرات والعلفة تعشعش وترطب الريش ....

راهو ما يتلوحش يتباع بنذابة فلوس للجراري والفوتايات

المضخمين .

بالشوية بالشوية نهبط للمرشي ، من الأول بالسرقعة كيف

الناس ، بيني وبين الهياط يدور الريرو ومن بعد نعمل رخصة

كيف الناس الكل ونحطك في المخزن تراقب الخدامة . الضوء

لا . أبوك واحد يتقاعس ... نحب الفلوس كيف الـ Bébé يد

تطعم ويدّ تنظف ويدّ تبئن حتى يربي الريش .

وانا ندور ونعكل ونشكل البيعات والشريات ونجيب العظم

متاع هولاندا وامريكا واستراليا ونعمل مشتله فُخار نعام :

هاو الصدر .

وندبر حانوت في مفرق الثنايا كي الناس الكل .. حانوت ممّو

بالنيون كيف الناس الكل ... نحط فيها بلاكة : «دجاج مُصلي

منظّم» باليونوات كيف القباضة الكبيرة بالصف

.... واللي يفسد الصف من عنكوشو نجيبو على المادة ..

يستاهل قليل النظام مرّة اثنين ، في الثالثة الناس توِّي Réglo ،

نتشهر وتدور ماكينة المصلي مع ماكينة الفلوس كيف ما عند

الناس الكل .

ونحطك على الكاسة وتحاسب وتراقب الصنّاع باش ما

يعبّوش الكسكروتات بالحم كي التجار الكل .

وانا نعمل Permis ونعملولها وحدة R 16 راهو النقل يتكلف

موش ما يتكلفشي .

.....

انا باش جبت الكراسي من عند هذاكه

.....

هي - « مصطفى » .

هو - كريت كرهبة بستة دينارات . شفت الضرب اللي  
يَحْتَمُ؟ ..... الحكاية صبّ المازوط بـ 500 فرنك .

.....

ستة دينارات نحّي منهم 500 فرنك هاذم 5.500 ربح صافي .

.....

ونخدم الكرهبة لحاجات اخرى ، الناس تعمل العباية بـ  
6.000 الفواياج . أنا بـ 5.000 . وكيف الناس يستانسو بي  
نردو بـ 6.000 كي الناس الكل . وعيني ميزاني والفلوس الكل  
نحطهم في البانكة ونعملو مشروع دويرة ....  
وين تحبها يا روجي ؟

هي - في المنزه كيف الناس الكل .

هو . تخلط ، تخلط .... نسكنولها في الشط .

.....

الدار بنينها شكل عربي بالنقشة حديدة والبيبان جوهري  
عاطيين على الاخضر وقبب واقواس و Faience على الداير .  
ونعملولها مشية لباليرمو كيف الناس الكل باش نكسموها .

ونشوف وقتها منين ندبر العُمَّة : دولارات وجنيهات .... في  
جعبة Dentifrice ومن بعد ما نكسموها ، نكريوها لسفارة والا  
مقاول والا قنصل .... بـ 200 والآ بـ 300 في الشهر . راهم  
يوصلو حتى 500 الف ..... من هنا لسنة شهر ، توي بمليون  
بلا هبوط .

واحنا نكنو روسنا في القاراج بعد ما ندخلو عليه التحويرات

اللازمة ونعملو جو ونعملو مسرح .....

متاع دجاج ونكركو الدجاج المصري والدندون ونعملو برياز  
بمسك الصنادق وقيعان الدبابز المكسرة ونرببولها كلب عربي  
مسبوع ماضي : هكاكه السراق يخطاونا !

.....

ونعملو سانية وبقرات .... وانت وقتها عندك الوقت باش  
تحبل بالكيف وتسرح بالدجاج في الطبيعة اذا بقاتلكم الطبيعة  
وما تشيدتشي بعمارات ناطحات السحاب المعتبرة ودخان  
الكراهب والكميونات والكارات وتلوث الهواء النقي بالقتال .  
ونعشعشك مليح باش تجيبنا قذع ونعملك خديمة للقضية  
وشيفور وطباخة كيف الناس الكل وانت الـ Roi وانا نعمل  
سوسيته Import-Export متاع حوايج ملبوس من البره  
بالقانون .

هذي موش كي الناس الكل .

واللي تشتهيه يجيك ولو من امريكا ، هات ينزاد القذع : عنتر  
نطلعوه ضابط في الطيران هكه حلمي انا يتحقق .

وكان تجيب لي بنيه ما يسالني ... نطلعوها طيبة تداوي  
الجراح كيف ما تحب انت ونكبروا الوليدات على طاعة  
الوالدين والقانون ....

أش نوّه رايك نحطوهم بيانة عند البياصات ؟

ينتجو فيسع على اللمع والنظام .... ونبعثوهم لفرنسا  
ياخذو لنا البكالوريا في الحفظ والامان . أش كان عليه في بلاد  
الروامة ؟ النبي قال : اطلب العلم ....

الطفل Saint-Cyr والطفلة Montpellier يحكيو عليها الناس  
الكل في الخارج .

.....

يتلهاو في قرابتهم ونزورهم كل صلاة ونعملولها تعدية على  
باليرمو خطف دوب ما نَسْوَقُو .....  
وكيف يكملو قرابتهم بالنجاح المطرد نعرسولهم : الطفل  
ضابط ! قَدْ وَلَبَسَهُ وَلَمَعُ وَالطُّفْلَةُ طَبِيبَةٌ زَيْنٌ وَحَيَاءٌ وَمَرْتَبَةٌ ...  
الذكوره والاناثي اللي يقول لك يتقاتلو عليهم ! ويجيبولنا  
الأولاد نعديو بيهم الوقت حتى يدببو ، نطهرو الوليد  
ونعرسولو وتوي بحفظك وانا صغير نندنن بالزرارق والطب  
المصبر وانت يدك لراسك ما تهزهاش .... في فرش مزين بالنوار  
وقرقاز على اليمين وقرقاز عند ساقك .

وفرملية كل ساعة تبدلك الفاصمة وتعمل لك Serum بالرعاية  
قدام عطفي أنا ....

حتى ..... ياقف سيدنا عبد الرحمان باش يتسلم امانتو  
نقولو : هذي روح طاهرة نقيه عندها شوية تبليير مع راجلها  
بالأخص في السابح أما الله غفور رحيم يا سيدنا عبد الرحمن  
هر أمانة رب العالمين .... السماح والوفاء .  
وتموت مرتاحة !

هي - في راسك .

يا مقعد يا بهبار يا مكسر العنكوش وفارغ المكتوب .

تسخايل روحك كيف الناس وانت حجام أشرف منك عندو دار  
وحانوت وفلوس انت خربة ما تكسابهاش .... هاي طايحه ،

هاي هابطه ان شاء الله تتردم فيها قبل اللوسي ويجبوك  
ميت .

اشنية حياتك ؟ تاخذ مرا وما عندكش رجولية باش تقوم بيها ؟  
هو - اللي صرفتو عليك ، بوك الفالس العساس في الديار ما  
يحلش بيه .

هي - تعابير في بابا ؟ بابا قام بي وباخوتي ووصلنا الكل  
وتهنى علينا .

هو - جرد مربية حليتلتها عينها وأعطيتها لقمة اكبر من فمها  
ورديتها بنت فاميلية .

هي - هاهها يا ولد الفاميلية ! بوك شاوش وعزيزك مشاشو  
ومماتك حنانة . سلالة متاع قفاهه في العتب متاع سي وسي  
ومسيو ومدام

هو - العيشة معاك حرام

هي - الموت ولا انت سكرت علي مستقبل زاهر .

هو - بزاعة قصاري في السبيطارات .... كرهتك .

كرهتك .

وكان نلقى .....

وكان نلقى .....

هي - تقتلني .... قولها .... وانا كان نلقى نحرقت حي باش  
تتليع كيما ليعتني وضيعتلي عمري يا تفشه .

هو - بانا وجه نقابل دارنا ؟ .... مازلت عندي وجه ونقابل  
عربي ؟

.....

تخرقت مع الناس .... تحب الكلامات ؟ ..... إلا ما نوئي لوبانة



في أقام الخلق . انا اللي نحب نذكره يقعد طيب .  
هي - ما اكبر غيبنتي قدام النساء . الحومة الكل عندها ما  
تحكي على سعدي المسود ، على موبيلتي اللي بالسوس  
واشكون يعرف أش يخترعو من كلام ؟ ...  
راهم يعرفو بعضهم .. وما عرسوا بها الزرية الا لسبب !!!  
تقلد كلام الجارة .

وخيتي ما نحرقتي قبري ..... يا ما يظهر لي اللي النازلة فيها .  
هو - عام نحضر في حفلة عمري .  
ما يوجعكشي قلبك على اللي جراي ؟ علاه يسجري في داري ؟ علاه  
يغيبلي غنايات تقشعر البدن ؟  
ماؤ خاطر انت دخلت في جوؤ . حتى العلي وئي «كافي شانطة»  
اللي يجي يعمل أش يحب .  
أصحنة تتكسر ، المنادل توئي محارم ، الكيسان بزاقات .  
أه سي بوك أش من فسايدي .

هي - والأ خطيب اختك والأ اختك ..... يبرزيك فيهم وفي منادك  
واصحنك وكيسانك وكراسيك ..... كلهم متاع روبافيكيا .  
ما قتليش انت المظاهر ما تهمش ؟ اللي بيه الفايذة صحاخ  
ويرتحو ، شدان يد ، حتى تجي الموبيليا الجديدة ؟  
.....

ياخي تفريك اللي تفريك وتكسر اللي تكسر والباقي مبهت تبهيت  
كيف هالسقف !

هذي خدمة ويخدموها الناس ؟ ....  
وما نعرفش علاش خذيتك ؟

هو - لواه الكلام ؟ راس ورويس قدامنا عمر كامل .

هي - علاش شديت عرفك وسيبتني .  
هو - ماو باش نضمنو المستقبل .  
هي - قداكش خايب خايب في هاللبيسة .. كايك ممسوخ .  
هو - وكان ريت وجهك كيف تقخر ؟ توئي عبيثة وكيف تبكي  
توئي عزوزه  
هي - وفي القدر ؟  
هو - هذي هي فوعة العرس .... ما بقالنا شيء ... كل شيء  
تفياً .. من توه نحزقو السننورة . الاقتصاد .  
هي - أش تعمل ؟  
هو - نهز قلبي بفاضل اسيايدي .  
هي - أمان تنساني ؟  
هو - مديك كيف الناس .  
هي - عملت المليح كيف طردتو بضخامة .  
هو - اشكون ؟  
هي - ما عليناش أحنا في فرح ما ناش باش نتلاكشو توه .  
هو - احمد ربّي ما قيمتش القيامة وقتها .  
هي - ملاً صاحب .  
هو - ملاً بوعندك  
هي - أش ملرنا نتعاركو .  
هو - شيء . اليوم الفرح .  
هي - يدوم الفرح .  
هو - خير من بلاش .  
هي - خير من هذان الدار .  
هو - هذاكه قدر

قدمت مسرحية « العرس » لأول مرة خلال شهر مارس من عام 1976 في قاعة يحيى للفنون .

اخراج : الفاضل الجعايبي / الفاضل الجزيري

التنسيق الفني والاضاءة : الحبيب المسروقي

تصميم الفضاء الركحي : الفاضل الجزيري

الشريط الصوتي : توفيق الجبالي

التمثيل : جليلة بكار ، محمد ادريس ، الفاضل الجزيري

هي - ريت ما أقبح غناياتو

هو - وحكايات بوك

هي - و « مارتين » .

هو - واختي في التزكينه هي والأجودان .

هي - و « مارتين » اللي شعيرة لا تقلبت وكان موش عرضتلها

الطاولة ....

هو - الحمد لله رَوَّحو ....

هي - هانا توّه وحدنا

هو - نعمة من عند ربّي

هي - لُبْسِتْكَ تهَبَل .

هو - ماريتش روبتك ؟

هي - مشات

هو - ما يسالش

يجبدها بنطرة يحب بيوسها

هي - قذاكش مجوטר .

هو - ما أضمرک

هي - السقف

هو - يبرک

هي - الدّار

هو - تتهد

أش يهمني فيها ؟ مايسالش

هي - وغدوه ؟

تم تصفيف وطبع هذا الكتاب بمطبعة  
شركة فنون الرسم والنشر والصحافة - تونس  
الإيداع الشرعي : جوان 1985  
السحب : 3000 نسخة .